



# RUDAR

LIST RMU "BANOVIĆI" / AVGUST 2018 / BROJ 86 / BESPLATAN PRIMJERAK



➔ **NAKON 10 GODINA REMONTOVAN  
BAGER EKG NA PK „GRIVICE“**



➔ **OD AVGUSTA KOLEKTIV RUDNIKA  
UVEĆAN ZA 100 NOVIH RADNIKA**

**UPRAVA DRUŠTVA USVOJILA IZMJENE  
I DOPUNE PRAVILNIKA O ZAŠTITI NA  
RADU I ZAŠTITI ŽIVOTNE OKOLINE**





**BAGER IZ 80-IH GODINA PONOVO U FUNKCIJI****NAKON 10 GODINA REMONTOVAN BAGER EKG NA PK „GRIVICE“**

**N**a površinskom kopu „Grivice“ tokom mjeseca juna izvršen je generalni remont na EKG 1 bageru koji već deset godina nije bio u funkciji.

Dugo se razmišljalo o isplativosti remonta bagera prije svega zbog rezervnih dijelova za koje nije postojala sigurnost da će odgovarati traženoj kvaliteti. Međutim, nakon detaljne analize situacije ipak se krenulo sa poslovima. Pokretanje bagera poslije toliko



godina ispostavilo se veoma značajno za kopove Rudnika jer je omogućeno brže ostvarenje planirane proizvodnje uglja i otkrivke, te kontinuirani rast produktivnosti.

Osposobljavanje bagera zapremine kašike 8 metara kubnih i kapaciteta otkrivke negdje oko 400 metara kubnih po satu još je značajnije uzme li se u obzir činjenica da će za mjesec dana krenuti povećana potražnja za ugljem. Poslovi remonta završeni su ubrzanim tempom za oko 20-ak dana. Izvršen je generalni remont bagera, osposobljen reduktor, zamijenjen rolni krug, zupčanik sa rolnama, zvijezde, papuče, osposobljen transport, te drugi dijelovi koji su bager doveli u potpuno funkcionalno stanje. Nosioci radova bili su radnici Rudnika okupljeni u stručnom timu ljudi sa posebnim zaduženjima za svaki pojedinačni segment remonta, a većina poslova zasnivala se na mašinskom sektoru.

Organizator i pokretač poslova bio je rukovodilac pogona „Površinska eksploatacija uglja“ Šehval Lapandić, dok je mašinskim dijelom poslova rukovodio Mirnes Softić.





Po završetku remonta bager je pušten u rad na površinskom kopu „Grivice“ na kojem trenutno rade četiri bagera. Remontovani bager radi na utovaru uglja i mijenja bagere većih kapaciteta, koji su sada raspoređeni isključivo na realizaciji otkrivke.


Nakon sumiranja i analiziranja isplativosti procijenjeno je da je remont koštao negdje oko 900.000 KM, što je neuporedivo sa vrijednošću uglja koji će u narednom periodu biti iskopan upravo ovim bagerom.

napomenuti da na drugom bageru ima znatno manje poslova, tako da bi i opravka trebala ići dosta brže.

Početak naredne godine na kopove će pristići još dva ugovorena hidraulična bagera marke Liebherr, koja će sa već postojećom mehanizacijom zasigurno dugoročno doprinijeti stabilizaciji proizvodnje na kopovima.

## NOVA ZAPOŠLJAVANJA

# 100 NOVIH RADNIKA U RUDNIKU „BANOVIĆI“



**V**eć prvog dana mjeseca avgusta 100 novozaposlenih radnika ovog kolektiva započelo je svoj radni vijek i krenulo sa poslovima i obavezama u različitim pogonskim jedinicama Rudnika.

Nedavno je bio raspisan javni konkurs za prijem 100 radnika na određeno vrijeme, a posebna potražnja izražena je za proizvodnim radnicima. Konkursom su traženi vozači dampera preko 100 t, bageristi, utovarivači u jami, radnici na čišćenju postrojenja i radnici na istovaru rovnog uglja. Na javni konkurs prijavilo se 637 kandidata od kojih je 185 imalo nepotpunu dokumentaciju. Nakon završetka kompletne konkursne procedure i detaljne selekcije kolektiv Rudnika uvećan je za 100 novih zaposlenika.



Obzirom da je u narednom periodu planirano značajno povećanje proizvodnje, te da su u toku radovi na izgradnji Transportnog sistema za prevoz jalovine već tokom mjeseca septembra planirano je raspisivanje novog konkursa za prijem zaposlenika, jer kontinuitet upošljavanja je ono što rudnik „Banovići“ i način njegovog poslovanja u svijetu privrednih subjekata čini prepoznatljivim.



**PROIZVODNJA UGLJA I OTKRIVKE****U TOKU PREBACIVANJE ŠIROKOG MEHANIZOVANOG ČELA U NOVO OTKOPNO POLJE, U AVGUSTU PROIZVODNJA UGLJA SAMO SA KOPOVA RUDNIKA**

**P**rvi mjeseci tekuće godine u RMU „Banovići“ okarakterisani su blagim padom proizvodnje uglja i otkrivke. Nepovoljni vremenski uslovi i određeni problemi na separisanju uglja usloveli su smanjenje proizvedenih količina uglja i realizaciju otkrivke.

Da se situacija znatno popravila bilo je vidljivo već u maju kada je zabilježen prebačaj u svim proizvodnim segmentima. Proizvodnja uglja prebačena je za 7,77% u odnosu na plan, što je posmatrano u tonama negdje oko 10.000 tona uglja više nego što je mjesečnim planom predviđeno. Shodno rastu proizvodnje uglja u ovom periodu povećana je i realizacija otkrivke koja je iznosila 1.045.955 metara kubnih čvrste mase, što je za oko 1,7% više od planiranih količina.

U mjesecu junu nastavljen je progres realizacije otkrivke kada je realizovano 1.086.499 metara kubnih čvrste mase što je za 2,14% više u odnosu na plan, dok je proizvodnja uglja ostvarena nešto manje od plana



odnosno proizvedeno je 108.328,2 tona uglja.

Posmatrajući kumulativne rezultate, od mjeseca januara do juna, proizvodnja uglja iznosila je 727.285,7 tona separisanog uglja što je za oko 60.000 tona manje od plana. Otkrivka je realizovana sa oko 89,01% u odnosu na plan, odnosno realizovano je 5.385.359 metara čvrste mase. Proizvedene količine uglja plasirane su na tržište što je u najvećoj mjeri uticalo i na ostvarene ukupne prihode koji su na kumulativnom nivou za period januar – juni iznosili oko 65.703.000 KM.

U mjesecu julu, za 26 dana, zabilježen je prebačaj na realizaciji otkrivke za oko 6,18%, odnosno realizovano je 886.790 metara kubnih čvrste mase, dok je u istom periodu proizvedeno 112.132,9 tona separisanog uglja.



Od početka godine iz jame je proizvedeno oko 270.000 tona separisanog uglja, što je oko 67% u odnosu na plan, dok je proizvodnja uglja sa kopova išla čak 6% preko plana.

U mjesecu avgustu proizvodnja uglja će se zasnivati isključivo na proizvodnji sa površinskih kopova Rudnika obzirom da su radovi u jami usmjereni na prebacivanje mehanizovanog širokog čela iz otkopnog polja Z6 u novo pripremljeno otkopno polje Z1/3.

Za početak prebacivanja opreme u novo otkopno polje bilo je potrebno izvršiti niz radova i popravki. Izrađeni su likvidacioni rezovi, očišćeno široko čelo od materijala, kao i sekcije, grabuljari i kombajni, te





izvršene sve pripreme za demontažu. Demontirana su prvo transportna sredstva koja se nalaze u transportnoj prostoriji, zatim čelni grabuljar Rybnik i kombajn SL-300.

Sva oprema na kojoj je primijećeno oštećenje i nedostatak izvučena je na vanjski krug JUG 3 gdje je urađen kompletan remont i priprema za siguran i nesmetan rad u novom otkopnom polju.

Prvog avgusta zvanično je počeo proces prebacivanja opreme i koji bi trebao trajati mjesec dana, nakon čega će u jami krenuti eksploatacija otkopnog polja Z1/3 dužine oko 380 metara. Po planu eksploatacija iz ovog polja trebala bi trajati do januara naredne godine.

Što se tiče istražnih prostorija radovi su privremeno obustavljeni. Razlog tome je nedostatak radne snage kao i nepovoljni uslovi u istražnoj prostoriji IP-5 iz

koje su povučeni radnici i oprema. Planirano je da se nakon prijema novih radnika i detaljnog razmatranja uslova rada nastavi izrada nove istražne prostorije IP-1.



Nadređeni za proizvodnju na kopovima navode da će u narednim mjesecima moći dati zadovoljavajuću proizvodnju uglja bez učešća jame, ali će sigurno trebati više truda i angažovanosti. Dovoljna količina otkopanog uglja i očekivani povoljni vremenski uslovi u mjesecu avgustu sigurno će doprinijeti da se plan proizvodnje uglja realizuje.

Važno je napomenuti da je u toku izrada Transportnog sistema za prevoz jalovine na površinskom kopu „Turija“. Završena je jedna pogonska stanica, a očekuje se i početak radova na drugoj pogonskoj stanici. Radove izvode zaposlenici TTU „Energetik“ Tuzla uz nadzor ovlaštene osobe iz Rudnika.





## ODRŽANA 26. REDOVNA SJEDNICA SKUPŠTINE RMU „BANOVIĆI“ D.D. BANOVIĆI USVOJEN GODIŠNJI IZVJEŠTAJ O POSLOVANJU DRUŠTVA ZA 2017. GODINU SA PRATEĆIM IZVJEŠTAJIMA, ODLUKA O RASPOREDU DOBITI NIJE DOBILA POTREBNU VEĆINU



**N**a 26. redovnoj sjednici Skupštine Društva održanoj 29.06.2018. godine u prostorijama Radničkog Doma razmatran je i sa 100% glasova dioničara usvojen Godišnji izvještaj o poslovanju Društva za 2017. godinu, sa izvještajem Neovisnog revizora, izvještajem Nadzornog odbora i Odbora za reviziju. Takođe je razmatrana i Odluka o rasporedu dobiti Društva za 2017. godinu koja nije dobila potrebnu podršku dioničara, te samim tim nije usvojena.

Sjednicom je u ulozi punomoćnika vlade FBiH predsjedavao magistar Amir Halilčević, pomoćnik Federalnog ministra za energiju, industriju i rudarstvo.

Retrospektivu poslovanja preduzeća u protekloj godini na početku sjednice prezentirao je direktor Društva dr. Munever Čerčić, rekavši da su zacrtani poslovni planovi u potpunosti ispunjeni, a finansijski rezultati znatno bolji u odnosu na 2016. godinu, što dokazuje i dobit u 2017. godini u iznosu od oko 6,1 milion KM. U svom izlaganju dotakao se i projekta izgradnje termoelektrane u Banovićima, kao i projekta izgradnje tvornice cementa.

-Projekat izgradnje termoelektrane nije zaustavljen, traži se rješenje za finansiranje 15% vrijednosti projekta što bi vrlo brzo trebalo biti završeno, obzirom da se intenzivno vode razgovori sa domaćim i stranim bankama - kazao je Čerčić.

Kada je u pitanju izgradnja tvornice cementa u Banovićima tu je došlo do određenih promjena. Obzirom da Vlada FBiH nije mogla izdati garanciju za projekat izgradnje cementare odlučeno je da se u realizaciju krene na drugi način. Aktivnosti će se nastaviti preko Agencije za privatizaciju kada bi se trebala formirati nova firma u kojoj će Rudnik učestvovati sa ustupanjem zemljišta, do sada dobijenom potrebnom dokumentacijom, laporcem, šljakom, pepelom i ugljem. Za uzvrat će Rudnik imati određeni procenat za upravljanje tvornicom cementa. Cijelu proceduru oko osnivanja preduzeća vodiće Agencija za privatizaciju, a potrebni dokumenti već su dostavljeni Vladi FBiH na razmatranje i izdavanje saglasnosti kako bi aktivnosti oko izgradnje cementare bile nastavljene. Nakon izdavanja saglasnosti biće raspisan tender za izbor Strateškog partnera.





## PRAVILNIK O ZAŠTITI NA RADU I ZAŠTITI ŽIVOTNE OKOLINE

# USVOJENE IZMJENE I DOPUNE PRAVILNIKA



**U**prava Društva je na 114. redovnoj sjednici usvojila izmjene i dopune Pravilnika o zaštiti na radu i zaštiti životne okoline koje se odnose na usklađivanje Pravilnika sa Zakonom o penzijskom i invalidskom osiguranju broj 13/2018 objavljenom u Službenim novinama FBiH 21.02.2018. godine.

Ispitivanje povreda, odnosno nesreća na poslu je suština izmjena navedenog Pravilnika. Naime, u členu 567. uvedeno je da se pod povredama na radu prema odredbama Zakona o penzijskom i invalidskom osiguranju **NE SMATRA POVREDA UKOLIKO JE PROUZROKOVANA:**

- Namjerno ili iz krajnje nepažnje osiguranika koji je obavljao radne obaveze, kao i na redovnom putu od stana do mjesta rada i obrnuto,
- Uslijed namjernog nekorištenja opreme zaštite na radu i nepoštivanja propisa o zaštiti na radu,
- Pijanstvom osiguranika,
- Isključivom odgovornosti trećeg lica,
- Zbog više sile,
- Zbog obavljanja aktivnosti koje nisu u vezi sa obavljanjem radnih aktivnosti,
- Uslijed namjernog nanošenja ozlijeđe osiguraniku od strane drugog lica izazvanog ličnim odnosom sa osiguranim licem koje se ne može dovesti u vezu sa radno – pravnom aktivnosti.

Takođe, u Pravilniku je navedeno i to da će se način utvrđivanja činjenica kod nastanka smrtnog slučaja,

kolektivne nesreće, teže i lakše povrede zaposlenika regulisati posebnim Upustom o postupku utvrđivanja činjenica kod nastanka povreda na radu.

Ukoliko se u postupku utvrđivanja činjenica konstatuje da je do povrede zaposlenika došlo pod ranije navedenim okolnostima ne izdaje se prijava o nesreći na poslu, a protiv zaposlenika se pokreće disciplinska odgovornost.

Povrede na radu definisane su članom 565. u kojem se navodi da se povredom na radu smatra povreda osiguranika prouzrokovana neposrednim i kratkotrajnim mehaničkim, fizičkim ili hemijskim djelovanjem, naglim promjenama položaja tijela, iznenadnim opterećenjem tijela ili drugim promjenama fiziološkog stanja organizma u slučaju da je povreda uzročno vezana za obavljanje posla koji je osnov osiguranja, kao i povreda koju osiguranik pretrpi na redovnom putu od stana do mjesta rada i obrnuto radi obavljanja djelatnosti na osnovu koje je osiguran.

Pod povredom se smatra i povreda koju je zaposlenik zadobio za vrijeme učešća u akciji spašavanja ili odbrane od elementarnih nepogoda, za vrijeme pružanja pomoći organima vlasti po njihovom zahtjevu, za vrijeme prekvalifikacije ili dokvalifikacije, za vrijeme vršenja određenih javnih funkcija ili građanskih dužnosti po pozivu nadležnih organa i za vrijeme učestvo-vanja na organiziranim sportskim takmičenjima.




## SAJAM ENERGIJE, RUDARSTVA, ZAŠTITE OKOLIŠA I PRATEĆE INDUSTRIJE „ENERGA 2018“: MISLITI NA BUDUĆNOST

Međunarodni sajam energije, rudarstva, zaštite okoliša i prateće industrije „Energa 2018“ pod sloganom „Misliti na budućnosti“ već drugu godinu za redom održan je u Sarajevu u dvorani „Mirze Delibašića“ KSC Skenderija. Zbog dobrih reakcija na prošlogodišnji Sajam i broja sklopljenih ugovora organizatori su i ovaj put odlučili da se tuzlanski sajam „Energa“, kao jedan od najznačajnijih privrednih sajmova, ponovo održi u Sarajevu.



U periodu od 19. do 21. juna ovom događaju prisustvovalo je oko 120 izlagača iz 11 zemalja svijeta i oko 200 učesnika konferencijskog dijela programa. Među prijavljenim učesnicima ponovo je bila i ekipa iz RMU „Banovići“, koja već godinama unazad prisustvuje i na svoj način doprinosi ovom jedinstvenom regionalnom energetsom događaju. Obzirom da je banovički Rudnik u državi već poznat brend ni ove godine nije iznenadilo veliko interesovanje prisutnih za poslovnu saradnju. Predstavnici Rudnika bili su dobri promotori, koji su uz detaljno pripremljen promotivni materijal imali odgovore i na svako dodatno postavljeno pitanje.



Svečanom otvaranju Sajma i presjecanju vrpce pored organizatora prisustvovali su Ministar vanjske



trgovine i ekonomskih odnosa BiH Mirko Šarović, Federalna ministrica okoliša i turizma Edita Đapo, ambasador Republike Turske u BiH Haldun Koc, premijer Kantona Sarajevo Adem Zolj, te predsjednik privredne komore BiH Mirsad Jašarspahić.

Ceremonijalno otvaranje „Energa 2018“ iskorišteno je i za potpisivanje ugovora o bilateralnoj saradnji i partnerskom odnosu između Međunarodnog sajma energije, rudarstva, zaštite okoliša i prateće industrije „Energa“ i Međunarodnog sajma rudarstva, prirodnih resursa i tehnologije „MINEX“ koji se održava u Izmiru. Cilj saradnje je stvoriti veće mogućnosti za povezivanje izlagača sa pomenutih sajamskih događaja.



Kroz sajamsko konferencijske sadržaje i diskusije ove godine akcenat je stavljen na energetske i klimatske politike u BiH, za koje se kroz izlaganja nastojalo pronaći najbolje rješenje i odgovor važan za napredak energetskog sektora u BiH.

Pod pokroviteljstvom Vlade Kantona Sarajevo, Ministarstva vanjske trgovine i ekonomskih odnosa BiH i Ministarstva energije, industrije i rudarstva FBiH i ovaj put na jednom mjestu bili su okupljeni predstavnici velikih uglednih domaćih i inostranih kompanija važnih za perspektivu energetike u BiH.



## „FOTOSAFARI BANOVIĆI 2018“

**BANOVIĆKE LOKOMOTIVE PONOVO ISPRED SVJETSKIH FOTOOBJEKTIVA**

**D**ругu godinu za redom na uskotračnim prugama rudnika „Banovići“ odvijala se velika revija parnih lokomotiva. Svjetski poznati rariteti lokomotive 83-158 i 55-99 sredinom maja bile su glavni akteri ovogodišnjeg fotosafarija na uskom kolosijeku u Banovićima. Sve je počelo prije dvije godine kada je na zahtjev ljubitelja parnjača koji su iskazali veliku zainteresovanost organizovan prvi fotosafari u Banovićima koji bi već sada mogao postati i tradicija.

Organizator ovog nesvakidašnjeg događaja bilo je Udruženje „Bosanski kolosijek“ i JU „Centar za zaštitu, promociju i razvoj turizma“ Banovići, uz neizostavnu podršku Rudnika u čijem se vlasništvu i nalaze pomenute lokomotive.

Brojni posjetioци iz BiH i regiona došli su ovjekovječiti nadaleko poznatog Ćiru i predivne pejzaže koje su imali prilike vidjeti u toku organizovane vožnje od platoa pretovara na Separaciji do platoa pretovara na Turiji. Na staroj uskotračnoj pruzi uvijek je moguće naći nove specifičnosti obzirom da su u pitanju rariteti koji se kroz fotografiju prikazuju u potpuno novom svjetlu.

„Bogata željeznička ponuda“ privukla je brojne posjetioce iz Bosne i Hercegovine, Srbije, Hrvatske i Slovenije, koji su sa interesom i užitkom došli popratiti i zabilježiti nesvakidašnju fotografiju



parnjača. Bilo je onih koji su se odazvali događaju kao veliki ljubitelji željeznica, onih koji su iskoristili priliku da se u doba dizelki prisjete načina funkcionisanja parnjača, ali i onih koji su se po prvi put prepustili isključivo čarima vožnje.

Jedan od ciljeva programa je promocija kulturnog naslijeđa općine, čije će savršene fotografije zauvijek ostati u arhivi ovog grada. Fotografije su pravljenje na najljepšim foto tačkama duž kolosijeka okruženog bogatim banovićkim krajolikom. Ovo je svakako i odlična prilika da se promoviše Rudnik, ali i grad koji ima tu čast da još uvijek posjeduje mašine ove vrste. Neminovno je da ovakva vrsta lokomotiva predstavlja izuzetno vrijedno naslijeđe koje se jedino u rudniku „Banovići“ nalazi u voznom stanju i svakodnevno koristi za prevoz uglja.





## STUDENTI U POSJETI POGONU „ŽELJEZNIČKI TRANSPORT“ ODRŽANA PREZENTACIJA NAJSAVREMENIJE OPREME ZA MAŠINSKO ODRŽAVANJE



Studenti treće godine Mašinskog fakulteta Univerziteta u Tuzli tokom mjeseca maja u okviru nastavnog programa i stručnog usavršavanja posjetili su rudnik „Banovići“, odnosno pogon Željezničkog transporta. Obilasku pogona prisustvovalo je oko 20 studenata u vodstvu asistenta Denisa Bećirovića. Cilj posjete bio je upoznavanje sa različitim uređajima koje Rudnik posjeduje i načinom njihovog funkcionisanja iz domena mašinskog sektora.

Nekoliko mašinskih inženjera iz Rudnika praktičnom prezentacijom probudili su kod studenata dodatna interesovanja o najmodernijim pomagalicama za rješavanje određenih problema na postrojenjima i mašinama u svim rudnikčkim pogonima. Za većinu njih ovo je bila i jedinstvena prilika da se sretnu i upoznaju sa najnovijom opremom, ali i metodama rada rudnika.



Također, u sklopu posjete studenti su obišli pogon Željezničkog transporta i prošli kroz bravarske radionice, radionice za livenje, te dizel halu.



Predstavljena im je i funkcionalna parna lokomotiva sa kojom su nešto kasnije imali priliku da se voze do rudničkih kopova.

Ovakav vid posjete ostavio je pozitivne dojmove, što je i rodilo ideju da se stvori obaveza obilaska rudničkih pogona barem jednom godišnje.

Mašinski inženjeri Rudnika su i putem seminara na temu mašinskog održavanja u pogonima firme predstavljali rudničku opremu i način rada preduzeća, te trud i ulaganja kojima se nastoji ići u korak s vremenom. Rukovanje ovim uređajima prepušteno je stručno osposobljenim ljudima, koji su stekli evropske certifikate i obavljaju poslove za koje su se ranije morale unajmljivati druge firme.



Održavanje postrojenja u pogonima Rudnika zasigurno je u velikoj mjeri pojednostavljeno i olakšano uz korištenje opreme dobrog kvaliteta, i baš iz tog razloga se ne planira stati sa njenim osavremenjavanjem.



## 11. JULI DAN SJEĆANJA NA ŽRTVE GENOCIDA U SREBRENICI MIRNOM ŠETNJOM GRAĐANI BANOVIĆA ODALI POČAST ŽRTVAMA



U vrijeme dok je u Potočarima trajala dženaza i ukop za 35 žrtava genocida u Srebrenici, građani Banovića su u znak sjećanja organizovali mirnu protestnu šetnju. Kolona od nekoliko stotina učesnika predvođena članovima OO Asocijacije mladih i Asocijacije žena PDA tačno u 12h nakon proučene Fatihe i odavanja počasti na Centralnom - spomen obilježju šehidima i poginulim borcima započela je mirnu šetnju prema Trgu žrtava Srebrenice.

Obučeni u bijelu odjeću sa transparentom „Sreberenica – da se ne zaboravi“ sudionici šetnje su u tišini došli na Trg žrtava Srebernice u Banovićima, te tako i ovaj put na dostojanstven način poslali poruku mira, ali i podsjetili na sva nemila dešavanja koja su zadesila Srebrenicu 11. jula 1995. godine, a koja se nikada ne mogu i ne smiju zaboraviti.

## U BANOVIĆIMA SVEČANO OTVOREN SAVREMENO OPREMLJEN TRŽNI CENTAR „ROBOT“

Krajem jula u Banovićima je otvoren novi savremeno opremljen hipermarket „Robot“ koji je do sada najveći prodajni objekat u gradu sa površinom od 3.700 metara kvadratnih. Ukupna vrijednost investicije kreće oko 5 miliona KM.

Otvaranje je ispraćeno kvalitetnim i zanimljivim sadržajem za sve posjetioce. Organizovana je podjela poklona kupcima, mnogobrojne promocije, te degustacije domaćih proizvoda, dok su za namjlađe bile pripremljene brojne zabave i iznenađenja.

Trenutno novootvoreni objekat upošljava oko 60 radnika, a ovisno o daljem napredovanju broj uposlenika će se sigurno povećavati.





# JU MJEŠOVITA SREDNJA ŠKOLA U BANOVIĆIMA SREDNJOŠKOLCI PROMOVISALI BANOVIĆKI TURIZAM



Učenici „Srednje mješovite škole“ Banovići tokom mjeseca maja boravili su u Sarajevu gdje su kroz projekat takmičarskog karaktera „Kulturno naslijeđe, mladi i inovacije“ promovisali banovićku turističku atrakciju, nadaleko poznatu parnu lokomotivu tzv. Čiru.

Projekat je organizovan zajedničkim angažmanom Goethe Instituta i Francuskog instituta u Bosni i Hercegovini, a povodom obilježavanja godine Evropskog kulturnog naslijeđa. Cilj projekta je da se otkrije i istraži evropsko kulturno naslijeđe i kulturna baština Bosne i Hercegovine, te pojača svijest o pripadnosti istoj evropskoj porodici. Ovo je bila prilika da se učenici upoznaju sa bogatstvom evropske tradicije, ali i da se svojim radom uključe u očuvanje kulturne baštine.

Oko tridesetak banovićkih srednjoškolaca istraživali su pojediniosti o parnoj lokomotivi „Čiro“ kao historijskom – umjetničkom djelu koje se nalazi u neposrednom okruženju i vlasništvu RMU „Banovići“, a za koje je potrebno razviti strategiju kako bi se ovo bogatstvo u budućnosti na najbolji način predstavilo široj javnosti.

Zalaganje, istraživanje i realizacija ideje protezala se nekoliko mjeseci, da bi rezultate višemjesečnog rada već 28. maja učenici pod vodstvom profesora

Nevresa Mujića u Historijskom Muzeju u Sarajevu predstavili kao viziju i ideju očuvanja banovićkog turističkog potencijala.

Osnovni kriteriji kojima se žiri vodio prilikom ocjenjivanja bili su istraživanje i uvidi na kojima projekat počiva, izvedba ideje, te primjenjivost ideje i njena održivost.

Na jednom mjestu moglo se vidjeti mnogo kreativnih mladih ljudi sa zanimljivim idejama i sjajnim pričama, od kojih se po principu takmičenja morao izabrati najbolji. Prvo mjesto osvojili su učenici iz Srednje građevinske škole

Mostar sa projektom „Kaldrma u Mostaru“.

Iako nisu uzeli nagradu, rad i istraživanje učenika iz Banovića biće promovisan i dalje. Urađeni projekat biće dio zajedničke izložbe koja će se održati u septembru 2018. godine u Historijskom Muzeju u Sarajevu, a potom i u drugim bh gradovima.

Mladi iz dana u dan pronalaze izvanredne načine da pošalju lijepu sliku iz Banovića, upoznaju okruženje sa svim banovićkim potencijalima i probude svijest građana o vrijednostima koje posjeduje ova Općina.



RUDAR informativna novina radnika  
RMU "Banovići" d.d. Banovići

[www.rmub.ba](http://www.rmub.ba)

Uređuje Redakcioni odbor:

Samir Numanović, predsjednik  
Amela Kantić, urednica  
Melisa Čaušević, novinar- saradnik  
Fertik Glibanović  
Salko Gutić  
Šehval Lapandić

DTP i štampa: "OFF SET" Tuzla

Riješenjem Republičkog komiteta  
za informacije broj 04-651-537/77  
od 6.9.1977.

List je uveden u Registar štampe R BiH.

E-mail: [kontakt@rmub.ba](mailto:kontakt@rmub.ba)  
[nadzorni.odbor@rmub.ba](mailto:nadzorni.odbor@rmub.ba)